

四庫全書

史部

欽定四庫全書

史部

江南通志卷十四

詳校官給事中臣丁雲錦

檢討臣德生覆勘

總校官編修臣王燕緒

校對官中書臣葉蒞

謄錄監生臣龔果

欽定四庫全書

江南通志卷十四

輿地志

山川四

揚徐工府太海通三州

揚州府

金匱山在府城西北七里郡邑舊志云明秀水吳
秀守揚州濬河積土而成樹以梅花名曰梅花嶺
嶺前有史可法墓蓋藏衣冠處也

北洋山在府西三十里一作白洋山

蓆帽山府西北十二里

得勝山在府西北三十里宋紹興初韓世忠軍捷於此因名

小金山在府城北門外名勝志云其地有雲山閣環碧亭平野堂諸勝為郡人遊觀之所今廢

浮山在府城內西隅石色如鐵不生草木

康山在新城內東南隅相傳濬河時積土所成明

正德中武功康海罷官來此與客讌飲彈琵琶處

有康山草堂

以上江都縣

甘泉山在府西門外三十里嘉靖維揚志云山有
七峰聯絡如斗平地錯落諸圓岡凡二十八如列
宿拱斗然北上有井泉甚甘故名分縣得名亦以
此

盤古山在府南門外三十里劉家集

烏山在府城西九十里

以上甘泉縣

天目山在泰州東四十里相傳有王仙翁嘗居此
山上有雙井相對如目水甚清冽

泰山在泰州西南壘土而成其高數仞以州名也
亦稱太山墩

羅浮山在泰州西北五里南畿志云在藪澤中不
為水沒遙望如羅浮然因名

茅山在泰州東北六十里嘗生香茅因名

中洲山在泰州東北百二十里西溪鎮北范文正

公監稅日壘土為山東觀滄海西望沃壤為一鎮之勝地

神居山在高郵州西南六十里舊志云南齊亘公嘗結庵於此有煉丹井又有排牙石人計其數輒忘山不甚廣而股趾盤礴甚大傍占數墟遂為州境之望

東山在高郵州治東北隅上有文游臺

城子山在儀徵縣北六里其形似城南畿志云魏

文帝於此築東巡臺

臘山在儀徵縣北三十里上有天井池冬夏不竭
又有白龍廟宋郡守王大昌禱雨有應

小山在儀徵縣西北十五里宋大中祥符間奉詔
建天慶儀真觀地

大銅山 小銅山在儀徵縣西北二十五里二山
相接南畿志云相傳為吳王濞鑄錢之所

冶山在儀徵縣西北四十里林疎而秀其上多石

北有牛頭山聳峭屬雲其峰九十有二山皆接六合縣界鷄留山在儀徵縣西三十五里舊志云伍子胥欲報浣紗女而不知其家乃留鷄於此山祀之因名

橫山在儀徵縣西三十五里元魏於此置橫山縣與方了二山鼎峙俱接六合縣界

方山在儀徵縣西四十里有王子石鳳凰橋黃龍池舊志云隋六宮駐此遂置方山府

了山在儀徵縣西四十里以兩峰形似而名一名
鴉山俗謂之奶山舊志云唐末黃巢屯兵其間寨
基猶存

靈巖山在儀徵縣西七十里舊志云唐僧神建立
道場於此曰靈巖寺山有偃月巖鳳凰臺鹿跑泉
白龍池瑪瑙洞

瓜步山在儀徵縣西七十里臨江峭絕互見六合
縣

青山在儀徵縣西南二十五里南臨大江

神山在儀徵縣西南二十五里山產細石五色皆
其上有九江王廟

焦家山在儀徵縣東北五里舊志云林壑蔥秀亦
可登眺上有三將軍廟

昭陽山在興化縣西四里有昭陽廟相傳楚令尹
昭陽食邑於此

雲山在寶應縣西南百二十里接盱眙界山能興

雲雨故名上有白龍潭水常不竭又有白龍廟仙人洞

駱駝嶺在府北一里今建縣學

蜀岡在府西北四里綿亘四十餘里西接儀徵縣界東北抵茱萸灣隔江與金陵諸山相對上有平山堂一名崑岡鮑昭蕪城賦軸以崑岡是也洪武舊志云揚州山以蜀岡為首上有蜀井相傳地脉通蜀寰宇記云蜀岡有茶園其味甘香如蒙頂蒙

頂在蜀故以名岡郡人藝花者亦多居此

國朝潘耒平山堂賦

伊茲堂之締構洵宏敞而宏倚起埃流而特起踞名都之上游崇臺

瑰其天造分華根營乎雲浮窮地勢於南條兮見江山之相參苞索牛而絡娶女兮納埃風乎不周
怡恂悅於虛無兮渺儼坐之所留爾其託體則平岡波池西走潞潞支阜屹立削成增高其面勢則
宅岡之陽居乾之位觀宇迴環林薄周被爾乃斬
薶巖以累砌規廣阿以築臺旁羅桂楫仰承吞梁
此宇岡則鱗解舒舒狀榜諸若騰若翔塗丹錯
碧反景流光遠而望之龍從春差若神山之出海
見銀岡也仰而湖之磅礴巍峨若射的之在空植
箭括也容兮如蛙半兮如冠露會雲舒不可乎得
原若乃踐平皋經長坂步廣除臨絕嶽瀏覽有無
獨容其是前臨揚土之博天兮原隰紛其錯重巖

龍巖於明星分社千雉之金墉天塹劃夫神泉兮
爲赴海之白虹層山迴顧於秣陵兮矗三茅之仙
峰左眺海陵原田每每藝波漉鹽利盡東海右瞰
揚子銅波嶢峴即山特冶吳濠以饒後巨浸之湯
湯分沐日月於中央洩斗門於邗溝兮轉舳艫於
帝鄉泛厯覽其無垠兮蹇躊躇以相羊至如朝光
綯野曠色勝陸晴景澄鮮微陰霖霖變合一瞬態
窮萬族長楊垂絲大隄水平芙蓉含華的皪芬馨
怒濤澆澆於曲江兮風雪颯灑於蕪城物無隱之
能通狀無奇而不呈耳目為之滌蕩天日為之開
明斯誠臺觀之巨麗海表莫之與京者也於是邦
伯郡牧來遊朱豫弭節停騶怡情遣慮賓從詳雅尊
組有序突觀夫風土之清嘉與民物之阜庶山川
之形便詭俗之遷注調燥濕於徽絃齊六轡之秉
馭遙興遠思超乎獨喻其或大夫君子善辭能文
比才曹劉方藻卿雲期春秋之佳日聊整駕而索

羣衆萬象於靈府吐元黃之續紛亦有都人士女
嬉春競往稅青驪泊蘭漿采靡蕪寧宿莽睇關河
結遐想極泛激沛自廣至如遊人放客經奇瑰材
鬱風雲乎未感臨岐路而徘徊塊獨道此巽愁兮
憑高望遠穆乎登臺惟民生之多故美天地之無
涯歲月忽其如流羗長吟而遠懷原夫揚之為上
也襟背江淮縮較水陸百貨所轉土膏衍沃故漢
代疏以為國隋帝巡而作宮唐藩宋闢承侈席豐
經營窮乎地軸斷極夫天工瑤臺瓊館穆穆若神
居者蓋不知其幾而今皆影滅光沈山移壑徙際
天驚沙覆地白葦螢飛秀麥之園兔穴枯桑之壘
惟斯堂也創自隆宋著於歐陽遺澤在人勿翦樹
棠五百年乃有賢牧實景德而齊光考國索乎故
址新厦屋於崇岡華不侈心儉不陋目高不絕陵
深不藏谷不勞民而就下不糜財而足形勢盡東南
之美風聲表士庶之愛續前薪於無窮宜可久而

可大嗟夫宇宙之悠遊兮惟令名為不刊德業若
大車之載兮文采輪轂而使前或鑄功於銅柱兮
或沉碑於深淵金石弊而名存兮孰轆轤之使然
披竹素之寥廓兮得兩嫩其猶比肩承休風而結
撰兮尚有
述於後賢

夾岡在府城東北七里東接灣頭鎮淮子河口與
蜀岡相屬

桃花岡在府南十五里震宇記云上有吳王墓

龍岡在高郵州西南九十里新開湖西界天長泗

州

虎墩在泰州海場范文正築捍海堤起虎墩即此
蒙谷在府東北五里竹西亭北

皂角林在府南三十里輿地紀勝云宋劉錡伏兵
却敵於此

馬鞍山在府西北三十五里

大海在府東北泰州興化俱瀕於海

大江在府南四十里西南由六合縣小帆山入儀
徵境過江都東至泰興西界江寧東界鎮江即揚

子江也儀徵西南當江濤壯闊之處為黃天蕩江
心水名南潞水

伊婁河在府南十五里輿地紀勝云即揚子鎮以
南至江之運河也隋以前揚子鎮臨江至唐江濱
積沙與瓜洲連開元間遂開此河

三汊河在府西南十五里江都儀徵瓜洲至此水
分三支故名亦名茱萸灣

淮子河在府東北十二里一名懷子河自儀徵陳

公塘來西北分派接雷塘下達淮子河入運河

槐家河在府東北十五里本槐姓所開者自陳公塘引雷塘水東匯淮子河入於運河

運鹽河在府東北二十里始於漢茱萸灣遺跡茱萸灣者吳王濞開此通海陵倉隋仁壽中復開以通漕今日灣頭自灣頭起東入泰州又東至海安入如皋縣界又東南至通州又東至海門又東達呂四場其支派通各鹽場者皆是自運鹽河而東

聯絡貫注於通泰興鹽各場者統名之曰串場河
山洋河在府東北六十里瀕宜陵鎮一曰山陽河
相傳即隋之山陽瀆也北經高郵入射陽湖

白塔河在府東北六十里南通揚子江北入高郵
州界明平江伯陳瑄所穿以行漕舟

芒稻河在府城東三十里納諸湖之水以洩於江
沙河在府城東十里宋轉運使喬維岳所開自蓮
河達揚子江今遺跡尚存

運河在府治東南即古邗溝也吳越春秋云吳將
伐齊掘江通淮運糧之河也故為漕河一名官河
其南水道有二一自儀徵東行一自瓜洲鎮北行
二河合流於揚子橋北經府城凡六十里而入邵
伯高郵寶應又北至黃浦入山陽縣界由清江浦
達於淮

晏溪河一稱西溪在泰州東北百二十里東通梁
垛場西入運河有西溪鎮宋相晏殊嘗監西溪鹽

倉民思之因名

濟川河在秦州治南入如皋縣境通揚子江

康濟河在高郵州城北亘四十餘里明弘治初侍郎白昂開複河於高郵堤東通運舟以避甃社湖之險孝宗賜名蓋即官河之別名也

牯河在高郵州治北舊名運鹽河東抵興化西通新開湖即今之東河也宋郡守毛澤民於此置斗門蓄洩堤之南北皆為良田

秦蘭河在高郵州西六十里發源天長之冶山東入武安新開等湖

橫京河在高郵州東北七十里亦名海陵溪東通興化西入於射陽湖

靖安河在儀徵縣西南即沙河也宋史云宣和中發運使盧儔請開此河以避大江樂官山黃天蕩之險今湮入於江

長蘆河在儀徵縣西四十里其上流為沙河宋天

聖中發運使張綸開以入江

梓新河在興化縣東南十五里自塘港西入得勝湖達於運河

蚌沿河在興化縣南三十五里與泰州分界

山子河在興化縣西四里通海陵溪轉入射陽湖
王瓊河在興化縣北三十五里與既濟盧家陳圖
鳳凰等河俱入大蹤湖

成子河在寶應縣東南十八里西北接望直港南

入章師蕩

弘濟河在寶應縣西即寶應越河明萬厯中築堤
建插賜今名

陰隲河在寶應縣汜光湖西明萬厯中邑令耿隨
龍開既避湖險且資灌溉民德之因名

新城湖在府西北四十五里東通官河

邵伯湖在府北四十五里與艾陵白茆新城甃社
諸湖相接旁有邵伯埭

黃子湖在府北六十里東通官河西至末口

艾陵湖在府東北四十五里邵伯鎮東北通綠洋
湖西接官河又府東北五十里有朱家湖亦通官
河

白茆湖在府東北四十五里官河水涸則引湖水
以濟漕運

綠洋湖在府東北六十五里西南接艾陵湖東北
入高郵州界水經注作陸陽又西有甕子湖

於祈湖在泰州東北三十里亦曰淤溪阮勝之記
云湖以村名其下流入雞雀湖

包老湖在泰州東北四十里雞雀湖東南畿志云
水清無滓雖與他水會而不雜挈壺氏嘗以此水
供滴漏

小西湖在泰州起雲樓下宋紹興初重濬堤植芙
蓉桃李彷彿如杭西湖

張良湖在高郵州北二十里通鵞兒白湖

新開湖在高郵州西北三里即高郵湖天長以東
諸水盡匯此湖而達於淮常有風濤覆溺之患康
濟河所以避此險也湖中有洲可百餘畝水漲不
能沒

樊梁湖在高郵州西北五十里自天長石梁河流
入州界瀦而為湖與新開甃社合稱三湖

石臼湖在高郵州西北五十里通甃社湖

甃社湖在高郵州西三十里宋崔伯陽有賦叙云

宋孫覺家於湖陰夜讀書覺寤明如晝循湖求之
見大珠其光燭天是年莘老登第後此屢見州人
連掇大魁舊志云珠見則有休咎之應

五湖在高郵州西六十里通天長縣銅城河黃魯
直詩云九陌黃塵烏帽底五湖春水白鷗前蔣之
奇詩云三十六湖水所瀦其尤大者為五湖是也
珠湖在高郵州西七十里通五湖

平阿湖在高郵州西八十里其東南為五湖或又

合新開甃社樊梁珠平阿為五湖云

武安湖在高郵州西南三十里通露筋河

鼉潭湖在高郵州東北九十里通海陵溪又仲村湖通於此

平望湖在興化縣北二十里湖中有平岡可四望故名按古志云湖中高阜有古墓人每得陶器製甚古又得一劍屈之首尾相就識者曰此即繞指柔也

吳公湖在興化縣北三十五里西入海陵溪舊志云昔有吳公隱此因以名湖

大蹤湖在興化縣北四十五里與鹽城縣分界西北入射陽湖

得勝湖在興化縣東十里舊名率頭湖宋建炎中張榮以舟師敗金將於此因改今名

廣洋湖在寶應縣東南五十里東南通沈垛港入博支湖

博支湖在寶應縣東南九十里北接馬長汀會射陽湖又高郵州東北有郭真湖志云蓋博支之誤即郡國志所謂射陽有博支河者也

津湖在寶應縣南六十里東通運河南接高郵界清水湖在寶應縣西南東會運河西南連汜光湖汜光湖在寶應縣西南十五里南會津湖西通灑火湖

灑火湖在寶應縣西南四十里西通衡陽河東北

通汜光湖南接安宜溪

白馬湖在寶應縣北十五里東北會運河北接黃浦溪

射陽湖在寶應縣東六十里北界山陽詳見淮安府

樊梁溪在高郵州治北自天長流入界東流入樊梁湖

石梁溪在高郵州西北發源天長縣入新開湖

金陵溪界高郵興化寶應泰州南受泰州邵伯高
郵諸水西北入射陽湖其在泰州者一名浦汀河
南溪在興化縣南即滄浪溪宋范仲淹有南溪駟
鷗詩

精陽溪在興化縣東北四十五里自白駒場入運
河

黃浦溪在寶應縣北二十里黃浦鎮南西通運河
東入凌溪又東北入射陽湖

深港在府南十五里明洪武中兵部尚書單安仁
濬又相接有馬泊港亦洪武中濬

七里港在府城東北十里舊唐書云唐敬宗時王
播鎮揚州於此開河通舊官河以濟漕運

羅塘港在泰州東四十五里今姜堰河是也

馬踏港在高郵州東北七十里東通海陵溪西入
射陽湖

西塘港在興化縣東南六十里南北橫亘通梓新

河入得勝湖

東塘港在興化縣東六十里南通泰州運河北達

鹽城

望直港在寶應縣東十五里西接宋涇東南通成
子河宋嘉定中縣令賈涉重濬

花師潭在高郵州北十里故縣村新開湖堤旁其
地又有清水潭

瓜洲在府南四十五里名勝志云瓜洲渡昔為瓜

洲村揚子江之沙磧也沙漸長民居其上唐為鎮
今其上有城

新洲在儀徵縣東南五里江中宋志云武帝微時
伐荻於此其北有北新洲上為沙漫洲又縣南十
里江中有天寧洲與新洲相映帶

旗干蕩在興化縣東十三里蘆洲之南宋岳飛曾
駐師於此

章師蕩在寶應縣東南四十里南通廣洋湖西接

成子河

馬長汀在寶應縣東九十里東北界鹽城南接博
支湖北會於射陽

宋涇在寶應縣治中受二陂所入之水貫於城而
東注望直港即市河也

張綱溝在府東三十里寰宇記云漢張綱為廣陵
太守開此溝引大石湖水灌田以此得名

子嬰溝在高郵州北七十里東南入射陽湖

夾溝在高郵州西二十里昔人開築以避武安湖之險者

長沙溝在寶應縣東二十五里東入廣洋湖西通運河

小海池在泰州西溪鎮廣福寺之東北捍海堰未築時其水直通於海

第五泉在府西北大明寺前唐張又新所品附宋

歐陽修大明水記

世傳陸羽茶經其論水云山水上江水次井水下又云山水乳

泉石池漫流者上瀑湧湍激勿食食久令人有頸疾江水取去人遠者井取汲多者其說止於此而未嘗品第天下之水味也至張又新為煎茶水記始云劉伯芻謂水之宜茶者有七等又載羽為李秀卿論水次第有二十種今考二說與羽茶經皆不合謂山水上乳泉石池又上江水次而井水下伯芻以揚子江為第一惠山石泉為第二虎邱石井第三丹陽寺井第四揚州大明寺井第五而松江第六淮水第七與羽說皆相反秀卿所說二十水廬山康王谷水第一無錫惠山石泉第二蘄州蘭溪石下水第三扇子峽蝦蟆口水第四虎丘寺井第五廬山招賢寺下方橋潭水第六揚子江南潯水第七洪州西山瀑布第八桐柏淮源第九廬山龍池山頂水第十丹陽寺井第十一揚州大明寺井第十二漢江中潯水第十三玉虛洞香溪水第十四武關西水第十五松江水第十六天台千

大瀑布水第十七 郴州圓泉第十八 嚴陵灘水第十九 雪水第二十 如蝦蟆口水 西山瀑布天台干
大瀑皆成人勿食食之生疾其餘江水居山水上
井水居江水上皆與羽經相反疑羽不尚二說以
自異使誠羽說何足信也得非又新妄附蓋之耶
其達羽辨南漆岸時怪誕甚妄也水味有美惡而
已欲水天下之水一二而次第之者妄說也故其
為說前後不同如此然此井為水之美者也羽之
說水無滲浸而喜泉源故井取汲者江雖長
然泉水雜聚故次山水惟此說近物理云

徐州府

九嶷山在府北五里一名九里山舊傳有穴潛通
瑯邪王屋有峰形如伏象故又稱象山稍西為團

山東為寶峰山西北為孤山看花山竝與九嶷相屬

赭土山在府北三十五里禹貢徐州貢五色土即此山土也有楚元王塚亦曰楚王山

境山在府北四十里相傳徐之封境界於此西臨泗水北數里有烏羊山焦山絳山又黃山在府北七十里半屬沛縣又梁山在府東北三十五里與境山連漕河所經也今有梁境牖

大彭山在府西三十里古大彭氏封此山左右猶稱大彭村又西十里為陶山有漢徐州牧陶謙墓丁塘山在府西南二十五里其東有丁塘故名一名拔劍泉土人稱為龍湫祈雨時應

任山在府西南三十里唐咸通時龐勛陷徐州迎勅使自任山至子城即此

雲龍山在府南二里州志謂山有雲氣蜿蜒如龍故名朱澤民記謂宋武帝微時憩息此山有雲龍

旋繞之異此為得之東巖中有大石佛故一名石
佛山唐末朱全忠遣子友裕敗徐州節度使楊溥
軍於石佛即此宋張士驥隱焉有放鶴亭飲鶴泉
山陰為黃茅岡山西南麓有流碧泉極甘美距城
里許為戲馬臺高數十仞廣袤數百步舊志云可
屯戍與城相表裏

大山在府南三里視州境諸山為最大兩峰中闕
一徑為南北孔道

胡山在府南三十餘里有拔劍泉又南二十里有
桃山山陽有驛

徐山在府南六十里一名武原山相傳徐偃王嘗
至此故名

奎山在府東南四里橫枕泗水與對岸駱駝山為
徐門戶

呂梁山在府東南六十里下臨呂梁洪洪上有雲
夢梁王二城或曰雲夢謂韓信梁王即彭越也稍

金多口人三
卷十四
東南有鳳冠山雙峰如鳳翅相連又有塔山峰山
子房山在府東景定志一名鷄鳴山世傳張良計
散楚軍處

定國山在府東四里梁貞陽侯蕭淵明禦燕慕容
紹宗於此

聖水山在府東八里與青頂山尖山相屬其間有
石潭世傳潛通泗水宋蘇軾嘗禱雨於此

聖龍山在府東十餘里一名勝雲山有石孔二如

龍眼久旱泉流不涸

彭城山在府東北三里上有黃石公廟

桓山在府東北二十七里亦名魁山東臨泗水宋桓魋作石槲於此俗又稱洞山相連聖女山

寨山在府東北三十餘里有羊山張孤山內花山梁山龜山四面環之相距各一二里龜山有石洞深晦莫測俗稱仙人洞又稍東北有石山舊有驛今廢稍東為檀山鳳凰山又東北十里有二郎山

山北麓有泉二曰拔劍曰馬跑其水由運鐵河達於泗

盤馬山在府東北九十里相傳漢高帝盤馬於此山產鐵漢鐵官唐鐵冶宋利國監俱置於此其陽有運鐵河

白茅山在蕭縣北石壁峭立前有平石稱為三仙臺故又名三仙臺山其右為香山左為鸚哥山竝列縣治之後

聖泉山在蕭縣西北二里上有聖泉僅一勺而不
枯山半有書聲洞相傳昔有聞誦讀之聲者其西
有桃花洞

箕谷山在蕭縣西南十里又曰冒山翹峙衆峰中
山麓有石嵌空玲瓏如太湖石

明山在蕭縣西南二十餘里一名彩鳳山山半有
穴俗稱虛窟甚深天將雨輒出雲霧其南十餘里
為昇高山山陰有黑塢三畝許夏秋積雨其水染

金史卷之八十四
卷十四
人衣即黑

丁公山在蕭縣西南二十餘里即楚將丁公追漢高祖處其地亦名丁里村

龜山在蕭縣西南三十里一名元龜山其西南為相山與宿州界

浮綏山在蕭縣南三十里其東為焦子山又東為天門山谿谷幽邃林木蒼鬱

龍岡山在蕭縣天門山南二里綿亘數里深谷中

有果老洞又南二里曰龍駒嘴衆山環繞中闕一
峪有雙龍泉只隔片石左甘右苦去龍駒嘴六里
有白米山又東為獐鹿山又東為雙頂山龍駒嘴
相連為黃桑峪亦名為藏峪相傳漢高帝曾藏此
遊者稱幽勝

永固山在蕭縣東南四十里下有永固鎮永固湖
俗稱海眼

霧瀦山在蕭縣東南五十里下有霧瀦泉淵匯數



畝

椒山在蕭縣東南八十里相近曰騫山

爛石山在蕭縣東十里其下為爛石舊志汴河舊迹也又小蒙大蒙里仁諸山並相聯屬

綏輿山在蕭縣東三十里下有綏輿里宋劉裕其里人也

碣山在碣山縣東南七十里與河南永城縣界其北八里曰芒山山有紫氣巖即史記漢書高帝避

隱處其東有戲山西有狼牙山又南為保安山西
為平頂山皆芒碭之支也

白駒山在豐縣東南十五里相傳漢高帝大會父
老於此歌白駒以留賓故名明代屢經河決山漸
平

東華山在豐縣東南三十里山有三峰其巔石方
平稍西削壁千仞又西為華陽洞深杳莫測洞西
口有石室中峰特起有自然石級可登山陽又有

洞五皆極幽勝

微山在沛縣東南三里相近為黃山沛縣無高山
大阜多平原

戚山在沛縣西南三十里縣之鎮山也其東為青
龍桂籍山高僅尋丈耳有飲馬池舊傳鄼侯牧馬
處

葛嶧山在邳州西北六里禹貢云嶧陽孤桐地理
志云葛嶧山在下邳西古文以為嶧陽是也

葺山在邳州西北九十里上有唐時藏梅寺遺址
顯陽山在邳州西北九十里其山高聳朝陽故名
倚宿山在邳州西北百一十里世傳韓信經此倚
山而宿

勝陽山在邳州西北百二十里其山高聳秀麗勝
於顯陽因以為名

黃石山在邳州西北百二十里上有黃石公廟相
近為穀城山

磬石山在邳州西南八十里近泗水或云所謂泗濱浮磬者也

艾山在邳州東北百里山多產艾故名按春秋時齊魯相會之艾在山東蒙陰縣志引之誤也

鐵佛山在邳州北百五十里上有三鐵佛

馬陵山在宿遷縣北二里陵阜如馬自山東迤邐而來為邑之鎮其岡脉曰靈傑山

峒崕山在宿遷縣北七十里漢以司吾名縣因而

得名上有石洞鑿其口為螭水噴不絕宋紹興末
守領張榮屯此以拒北兵岵之南為五華峰又
南為斗山又南為峰山

塔山在宿遷縣東九十里與沭陽界上有土城相
傳為五代時郭彥威屯兵處

象山在睢寧縣北四十五里三面據河

羊山在睢寧縣北五十里面臨黃河一名陽山

絆河山在睢寧縣北五十七里其下河流三面縈

金匱山志卷之八十四
八十四
帶因名或訛為半戈

劉胡山在睢寧縣北七十二里舊志云昔有劉胡將軍寓此故名

龍虎山在睢寧縣西北六十五里二山相屬

國朝康熙二十四年河臣靳輔於此鑿為石牖名曰天然

鳳凰山在睢寧縣西北七十里山形似鳳而名

張龍山在睢寧縣西北七十里上有張龍神廟下

有塘其三面障以石復蓋以石或曰龍潭也

大黃山在睢寧縣西北七十里山高而長舊志云
為邑中河北諸山之宗南二里為鯉魚山以其形
似游泳於河上也

龍泉山在睢寧縣西北八十里高聳環亘岸外舊
中山之陽有上中下三泉冬夏不涸

黃山在睢寧縣西北八十里有黃華洞可容數十
人因地近圮橋相傳黃石公曾隱於此又名黃石

峒

九頂山在睢寧縣西五十里以九峰相連故名環抱如城中含平曠

仙人掌在睢寧縣西六十里上有掌痕尺餘蓋仙迹也偶然而見尋之則無

孟山在睢寧縣西南六十里孟山湖中與靈璧界舊志云睢水由此入境

池山在睢寧縣東南四十里以四面臨河如池而

名其南入虹縣界別名赤山

初月阜在碭山縣西里許中高四下形如初月俗名靴尖阜乃當時築以捍城者

水墨巖在蕭縣石盆澗上石皆墨花如畫似大理石

泗河在府東北由山東歷沛縣至府城東北受汴水合流而東南入邳州韓愈詩所謂汴泗交流郡城角是也

黃河在府東北自河南虞城流入碭山界經蕭縣至府東北在邳州南二里合於泗水東經宿遷南入於淮當其衝者睢寧累受其害詳見河渠志

汴河在府北由河南厯碭山蕭縣至州東北合泗水而南

運鐵河在府東九十里宋鑿後淤明嘉靖間復濬
通新挑溝

西流河在蕭縣南二十里浮綏諸湖之水由此入

山西湖會於兩河口入汴

淇河在蕭縣西南五十里東北流達於州境而會於兩河口

禮河在碭山縣東北二十里舊名夾河元末韓林兒與父老別於此稽首為禮故名北五里為桑葉河又縣有陳霜口三里白川段莊新岔等河大抵皆黃河之支流所經也

運河在沛縣東北

武河在邳州西北五十里源自山東嶧縣馬旺湖
流經州西北二十五里匯為蛤湖又州西北二十
里有鰻湖亦武水所注也引流五十里由乾溝口
入於泗

加河在邳州西北九十里源出山東嶧縣東會沂
水接州東之直河又東南入宿遷縣境之黃墩湖
駱馬湖從董陳二口入於黃河詳見河渠志

成子河在邳州北五十里源自沂州蘆塘湖流經

營河入於武河

營河在邳州北百里出自沂州抱犢垆經黃石山
泃口考究泉入運河

直河在邳州東五里

漕河自山東臺莊抵邳州東南歷泃口鎮由直河
東經宿遷之小河會於黃河

曲呂河在邳州東南四十里源自壩頭入洪河又
會直河入泗其流濼洄往復因而得名

金匱要略卷之十四
卷十四
清水河在邳州護城堤南內通城河舊黃河所經也與睢寧中分為界

白洋河在宿遷縣東南三十五里即小河之支流也

阜河在宿遷縣北四十里源出縣之港頭社流入於泗以土黑故名

汴塘湖在府東北百餘里南流入邳州沂河

黃山湖在府北八十里黃山東水漲則與沛縣之

昭陽湖通溢入運鐵河

雁麥湖在府西南四十里相連張塘湖馬溝陂接
蕭碭之境冬春為平原夏秋為巨浸

鶯兒湖在府東五十里辛賈山下州東北四十里
有柳泉南流入鶯兒湖

浮綏湖在蕭縣南二十里浮綏山東南為永固湖
又南為梧桐湖稍西南為時村湖又南為土形湖
皆南合於睢水其匯於西南者為山西湖匯於東

北者為姬村湖連絡濳洄頗稱巨數

昭陽湖在沛縣東北八里俗稱刁陽湖山東鄒滕
二邑之水咸匯於此下與薛水合至金溝口達於
泗以濟運

呂孟湖在沛縣東南四十里又有張莊微山赤山
諸湖與昭陽湖並為潄水濟運之處

白鹿湖在宿遷縣西南五十里由小河入運河

駱馬湖在宿遷縣西北四十里由陳瑤溝入運河

黃墩湖在宿遷縣西北源自南旺湖由徐州荆山口至全河汴塘入州境經成子河入於運河

諸葛湖在宿遷縣西北八十里每春月陰晦時常有城池廬舍隱隱可見如海市之狀

管坊湖在宿遷縣北四十里歲旱即通車馬為青齊要路明萬厯中建石橋其上泥淖乃免

峰山湖在宿遷縣北四十五里明洪武中主簿陳世能疏通以去水患

侍邱湖在宿遷縣東五十里一名東湖饒魚蝦之
產又縣東南有茅滋湖受侍邱之水入於運河

合湖在睢寧縣西北七十里合沂水南入黃河故
名近葛嶧山故又名葛湖

白山湖在睢寧縣西北七十里山水所匯向為大
湖後因河決沙淤半成田畝矣又縣西北有白馬
莊湖黃山湖皆如之

睢水在府南六十里自蕭縣流入境又東接宿州

界項羽敗漢軍於睢水即此其東出者曰穀水南
出者曰蘄水

豐水在豐縣北與泡水接

泡水在沛縣南其上流即豐水也自山東單縣流
入豐縣界東經縣城至泗亭驛入於泗亦曰包水
潞水在沛縣東北自山東滕縣流入昭陽湖又東
南達於薛水

薛水在沛縣東南十里自山東滕薛之境西流會

昭陽湖達於泗明嘉靖末開新河因築石堤橫截其流南注微山呂孟諸湖

泗水在邳州南二里源於山東泗水縣流經彭城至州西會沂水東至清河縣入於淮元明而後其下流遂為黃河矣

沂水在邳州西一里源於山東沂水縣西南流至州西入泗

龍潭在蕭縣東南七十里出龍岡山其水瑩澈皎

潔如月土人稱為龍潭皎月

百步洪在府東南二里一名徐州洪泗水所經也
水中亂石巉巖與驚湍相激舟行病之凡數里始
靜洪形如川字中曰中洪西曰外洪東曰裏洪亦
曰月河相傳唐尉遲敬德所鑿

呂梁洪在府東南五十里有上下二洪相去七里
巨石齒列波濤洶湧莊子所謂呂梁懸水三十仞
流沫四十里是也尉遲敬德嘗疏鑿以殺水勢今

尉城其遺跡明成化間主事費瑄壘石為堤歸水於洪呂梁之險十去五六

境山溝在府東北二十里源出馬跑泉西南流三十里徑境山鎮又南入於漕河境山之北又有池
浜溝

北溜溝在府北六十里其南十里曰南溜溝又有謝溝秦溝夾溝大彭溝皮溝皆在州北為昔時大河決溢處通塞不時

李家溝在府東南三十里鴛兒湖水分流出此入大河又響水溝在州東南七十里源出雙井白塔二泉入於泗水

狼矢溝在府東二十里又東十五里有磨臍溝黃水暴漲時從此溢入明萬厯中於溝口築堤防護衝決之患少息

鴻溝在蕭縣西北四十里源於山東滕縣流注薛水

金日入
卷十四
龍扒溝在碭山縣東南三十里舊通汴水明嘉靖
中又開從三龍口至西鎮澱過蕭縣境入湖澱溝
與大彭等溝為州西北之五河俱大河衝溢處也
草狼新溝在宿遷縣南洩侍邱湖之水明萬厯中
曾濬之

龍泉溝在宿遷縣峒嶧山下分為二東入沐河西
入阜河

太倉州

穿山在州東北五十里中有石洞通南北行臨海
記云昔有浮海揚帆於其中者明正統間居民鑿
地得椀其末徑尺有二寸蓋海中小島也今山在
平陸去海二十餘里

鎮洋山在鎮洋縣明弘治十年知州李端築今分

縣以此名附明祝允明鎮洋山記

弘治十年蘇州府新建太倉州

成遵詔命也堪輿肆其樞蒸黎矢其謨而巡撫右
副都御史朱公瑄建白之太守曹公鳳主維之同
知萬公祥等申畫之所以造規考工凝績垂遠咸
出於州守李公也初治廨既立百具皆作而相維

沿州之東滄溟環輪搖汨滔茫萬古不休雖新邦
呀然傲睨踞壓而萬井衡夷無標極之形於是即
所宇後築為崇巒肖象三山中隆夾亞堅壤豐積
樂石奇瑩材木蔚章鳥獸馴集爰乎摩蒼霄歲乎
跨黃祇風蟠氣迴情愜勢到足以聯絡地軸支控
鯨渤而又為亭者三居山之前曰迎仙首曰來仙
西偏曰遊仙為洞一居山之麓曰集仙既成州人
謹聳征商歸矚夷倭附服舩安流伯若興寶龍
魚帖居乃稽勲名山謂之鎮洋同知州事周君明
等令義官鄭餘慶請記夫兩儀育物而川岳奠位
王公設險則城隍作藩肇州封山其來久矣又况
唯洛食而周鼎定咸陽峙而漢闕依形相之方孰
可違廢然而不藉賢宰疇匡聖圖故龍門砥石禹
成舜功南交銅柱撥標漢業厥今沙海漸豐揚波
不聞所謂龜策協從神鬼受職因民而利職競踪
人然非深不足以經遠非明勿庸以輔幽有如茲

州傲構斯山罔興化機物情未云周審今則地理
順謚水土平康物性克而形勢暢陰陽和而陵犯
解易曰后以財成天地之道輔相天地之宜以左
右大臣也者承君之義以致之民者也則鎮洋之
創我后知始羣公作成乾坤交宜人物攸賴豈不
謂財成輔相者歟非天下之至深至明其孰能與
於此惟李公抱英荷傑直氣凜凜殆乎海其
知而山其仁者也公名端字表正棗陽人

應奎山在嘉定縣學南初學與留光寺逼處明天
順間築土山以障之嘉靖時又增築焉引橫瀝涇
環其下

寶山在寶山縣明永樂十年平江伯陳瑄督海運

築此以達烽堠附明成祖寶山碑記

嘉定瀕海之墟當海流之

會外即滄溟浩渺無際凡海舶往來最為衝要然無大山高嶼以爲之表識過晝晴風靜舟徐而入則安坐無虞其或晝夜烟雲晦冥長風巨浪帆檣迅疾倏忽千里舟師弗戒瞬息差失觸堅膠淺適取顛躓朕恒慮之今年春乃命將士相地之宜築土山焉以爲往來之望其趾東西各廣百丈南北如之高三十餘丈上建烽堠晝則舉烟夜則明火海洋空闊遙見千里於是咸樂其便不旬日而成周園樹以嘉木間以花竹蔚然奇觀先是未築之前居民恒見其地有山影及是築成適在其處如民之所見者衆曰是蓋有神明以相之故其兆先見皆稱之曰寶山因民之言仍其名而不易遂刻石以志之詩曰滄溟巨浸渺無垠混含天地相吐吞洪濤架山巖嶸奔巨靈崩屨相噓歎揮霍變化

朝為昏歎神祕曠日黠昏蒼黃拊髀就為援及起
茲山當海門孤島絕秀猶崑崙千里示表鬱燁燁
永令汎濟無憂煩寶山之名
萬古存勒石悠久同乾坤

蛇山在崇明縣東北海中一名長山一名茶山舊
志云有二峰東峰不可上其西峰頂有石大數畝
五十七松環之南有呂純陽碑

洋山在崇明縣蘇州洋與蛇山相近其別有十八
嶼可泊海舟避颶風

鶯遊山在崇明縣淮河口為崇明江淮會師汛地

金鳳山在崇明縣三沙舊名金鰲取宋高宗航海
所至之山為名後廢

國朝康熙三年總兵張大治重築

岡身在州東曰上岡身曰下岡身曰歸吳岡身在
新安鄉曰青岡在惠安鄉曰王家岡續岡經云瀕
海之地岡阜相屬謂之岡身天所以限滄溟而全
吳人也

拋沙墩逃鹿墩在州城北門外皆童阜也

東岡在嘉定縣東南二里縣無山而有岡海水積沙之所成也土人名為岡身四境皆有之

大海在州東北及嘉定之境俱東際於海而內地水道無不通潮汐者崇明東沙之東所謂蘇州洋也其東北有淡水洋即揚子江尾味甘如惠泉東南為鹹水洋

大江在州境東北入海

婁江在鎮洋縣南自崑山縣流入州境環城南而

東為劉河口入海凡一百八十里受震澤西來諸水一名下江元時海運道此或曰婁劉音訛也

吳淞江在寶山縣自崑山東抵縣界又東過黃渡江灣又東北入海

大通河在崇明縣東三十里又縣東四十里有惠民富民二河八十里有天仙河此內地之支河也施翹河在崇明縣北西自長沙逶迤達於袁孫吳三沙此沿海之幹河也

鑄脚港在州東北受諸涇之水東流入於海

七鴉浦在州北三十六里一名七了又名七浦太倉之水七鴉浦為大通常熟崑山二邑諸水西承巴城湖東入於海

顧浦在州西南五里引吳淞江水入吉涇又東折而北為戚虞涇與南鹽鐵張涇橫漚諸水俱入婁江

三槎浦在嘉定縣南三十里有上中下三槎

半涇在州東三里南入婁江北經湖川楊林至於
七浦自張士誠開九曲河而半涇漸淺涸

橫漚在州東南南經婁江入吉涇塘北經七浦入
常熟

海州

胸山在州城南四里秦置胸縣以此二峰如削俗
呼馬耳山按史記云始皇立石東海上胸縣以為
秦東門或謂秦立石胸山之上誤旁有五龍潭青

龍澗

石棚山即胸山之東北嶺也舊志云有巨石覆岩成室可容十數人山嶺甚峻初無花木宋石曼卿判海州讀書於此乃以泥裹桃核為彈擲之數年間花發滿山

大伊山 小伊山在州南百里南北相向距二十里許虎山在州西南五十里山東南有龍山皆以形名也

弁霧山在虎山東北雲霧在上望之常如冠弁

華蓋山在弁霧山東以形如蓋而名

沃壤山在華蓋山北近石城村西北連海山下潮

水往來滋溉民田

牛山在州西南七十里產水晶石

北望山在州西南百六十里上有石白二俗謂始

皇洗頭盆也名勝志云山上馬跡猶存

白玉山在州西百里羽山之南其石潔白如玉

馬嶺山在州西百五十里與郟城界

羽山在州西北百餘里相傳舜殛鯀處禹貢云羽
畝夏翟鄭註云羽山之谷也下有羽潭左傳所謂
羽淵也

巨平山在州北三十里州志云一名由吾峰南接
東海北抵墟溝上有白龍潭又棲雲山即巨平之
北嶺昔有僧結棲雲精舍於此

朱紫山在州北四十里丹崖赤壁自相輝映望之

若朱紫然

鬱洲山州志云在州東北海中有大洲謂之鬱洲
一名柳州一名蒼梧山俗以為自蒼梧來也

雲臺山在州東北四十里幽深秀特常冠雲氣一
名青峰頂山北有望日峰昧爽時可見初日

國朝帥顏保開復雲臺疏畧

為額復雲臺上助漕運下
存牙遺事據淮揚道副使

黃柱呈詳到臣該臣看得淮安府海州生員江之
應等呈稱雲臺一山上建三官祀廟砥柱江河默
顯定道緣順治十八年柴入壘撤海邊各口嚴釘
樁木浮葦浪草遇椿存滯沙淤河淺尾閘不洩以

致桃源諸堤屢潰民遭水厄淮揚九載水災為治
河計莫善於復雲臺而清海口等情臣隨批行各
官酌議復經移咨督撫河提諸臣會商前來查此
山實與州城甚近比別島遠在海中者不同其山
週圍共計三百餘里物產民聚向稱豐腴稠密且
條屏障海口為黃淮之尾閘自從廢為禁地以來
壅沙日積黃淮漫決以致淮揚水患頻仍而運道
民生俱有堪虞今應否開復雲臺山為內地統候

部議

小高山在州東北六十里孤峰特秀三面壁立俯
臨深谿惟東隅可通人行上有田橫岡又有平山
在州東北百里

鷹遊山在州東北海中去平山十五里一作嚶遊
山元時海運之所經也

孔望山在州東輿地要覽云孔子問官於郟子嘗
登此山以望東海又名古城山地理新書謂即古
海州故城

社林山在州東六里以上有土穀神祠故名其東
北有浦山

銀山在州之石湫鎮九洪橋北其山近海多白石

日出照耀如銀

朶山在州東五十里按山東登州府有之朶山乃
始皇射巨魚處舊志誤引於此

盧石山在州東南六十里山多黑石漢書云韓信
為楚王鎮於三盧即此宋張耒云三盧者此與伊
盧句盧二山也

大星山 小星山在州東南七十里二山相對舊
傳為星所墜

伊盧山在州東南八十里上有龍祠多石罅清水漾於罅中禱雨多應史記云鍾離昧家在伊盧

東陬山 西陬山在州東南百里二山對峙東陬居海中西陬居海隅

螭山在州東南百里海中潮至則沒其半山多螭故名

夾谷山在贛榆縣西四十里舊以為齊魯會處本寰宇記之謠也山東濟南府淄川縣有夾谷山一

名祝其乃齊魯會處

紀鄆山在贛榆縣西七十里春秋云齊師伐莒莒子奔紀鄆即此

吳山在贛榆縣西北三十里巒壑奇秀舊傳有吳姓者居此歿而靈異遂以名山

大金山在贛榆縣治縣北面跨山而城號為雄麗又縣北二十里有小金山河在其北

懷仁山在贛榆縣北四十里東魏置懷仁縣以此

青山在贛榆縣北四十餘里舊贛城在其北

阿夜山在贛榆縣東北七十里有水簾洞對峙者

為欄頭山其山有石欄可障海濤

了髻山在贛榆縣東北七十里兩峰相對

秦山在贛榆縣海中去岸四十里舊傳始皇登此

求仙勒石而去水底有神跡三十餘里闊數尺自

岸抵山俗謂秦人所築洪波浸激迄今不圯潮落

可褰裳而涉也

武強山在贛榆縣南三十五里昔有海寇登岸鄉
民黃雄率衆禦之既歿而民祀之嘉其保障之功
因以名山

建陵山在沭陽縣西北百里其山東西狹南北長
上多陵阜漢立建陵縣於此其南有神山

塔山在沭陽縣西北百里界宿遷

韓山在沭陽縣東北六十里世傳韓信追項羽於
此故名南有楚王廟又縣東北七十里有孤山

分水嶺在贛榆縣北七十里有水一線自石間射出分為東西二流一名分泉

獅子巖在州北二十里有濯纓泉下有鬱林觀相傳有徐生學道於此一夕仙去

大小二島在州北五十里兩山對峙潮生則沒竹島去州城八十里在海中上多小竹

大海在州東境南接胸山北連贛榆往來渡處名黑風渡廣二十餘里必擇日致祭乃敢渡焉

景濟河在州東南二十餘里運鹽河也又穿心河
在板浦鎮南通此河北接雲臺

官河在州東南四十里自新壩南入安東支家河
板浦河在州東南四十里與白蜆芹支二河俱自
官河東流入海

界首河在州南其源西自太湖東入官河

莞瀆河在界首河北其源西自官河東流入海通

運鹽舟楫

石湫河在州南二十里舊時州境之水皆匯此以達於海

漣河在州西南上引沂沭及桑墟湖之水經石湫及黑土灣入海

房上河在州西南六十里與魯蘭河俱源自馬嶺山東入官河

薔薇河在州治西一里其源自羽山來內接州城市河北通贛榆東入於海

一帆河在官河東北南至安東入於淮

小沙河在贛榆縣南六里源出山東莒州上接沫河下流為青口河入海

大沙河在贛榆縣南五十里舊名廟灣子沙河源自山東郯城縣從大沙河鎮東入海沿河有堤

臨洪河在贛榆縣南六十里通蒿薇河明景泰間疏導通海舟楫甚利今復塞

朱汪河在贛榆縣北二十里下流為龍王河

荻水河在贛榆縣北七十里源自山東莒州東流
入海

孫家河在贛榆縣東南四十五里武強山諸湖之
水由此入海

碩項湖一名太湖在州西南西達桑墟湖南界沫
陽安東亦見淮安府

桑墟湖在州西南九十里與沫陽界

金湖在沫陽縣東南五十里

宿城浦在州北七十里四面俱山舟楫遇風宿此
沃壤浦在州北七十里又有白溝大義山陰當路
溪雲社林諸浦俱通海潮便魚鹽

徐瀆浦在州東北四十里納巨平諸山之水入海
堯水在贛榆縣西南八十五里又有劍水二水皆
源自山東沂州流入縣界合而東注於海

沫水在沫陽縣東南自郟城流至縣境又東入於
桑墟湖周官所謂青州之浸是也

張家溝在沭陽縣西五里即沭河分流處

品泉在州南門外三井鼎連其味甘冽或謂近於

惠泉

溫泉在州之博望鎮西五里冬夏如湯

通州

狼山在州南圖經云與劍軍等五山相屬又名狼
五山相傳有白狼居此或云山形似狼也形勝甲
淮南蓋一方之鎮也其嶺有支雲塔塔前有明初

勅建江海神祠其左右皆軒亭覽勝之所山之陽
有獅子石松岡千人洞紫石海月觀音諸巖又有

神人鞭石處世傳秦皇時事也附宋劉弇狼山記

白狼五山距通州城南十里率不百步則嶄然迭
起若踞若躡若前拱後負若期而赴有待而不相
踈而五山者通人能道其名仙蛻其上者曰仙女
山閻盧曩軍其旁者曰軍山形銳且中踳者曰劍
脊曰馬鞍至臨以佛宇則號寶塔山秀絕可喜而
好事者往往取以矜游客謂狼嘗擾而居也元豐
四年冬介按田山旁至則求觀所謂五山者入寺
東廡得乳泉號幻公井幽光浚發若上噴狀若飲
者利其甘爭至赴汲井自闢山僧知幻所繫故名
方丈東阿有石僅十尺許長倍廣三之二昔從山

椒墮號飛來石自堂折而少北貫以澀道躡之纒
繞如繩席上紫道左閣曰棲雲庵曰海桐亭曰半
山曰望江皆森爽豁濶可蔭以休而閣加於庵之
廣亭加於閣之峻者倍且半又卻轉得榻琦更澀
旋小覺酸軟度非三休不至絕頂因力躋焉方是
時朝日初上瞳矓如曜金發莽蒼中洞視上下不
滿楸檉佛螺蚌附地別出則南峙之福山也排
天決雲吞霄淮吳則東浮之三瀛也稻畦葭澤潮
汶上下沮洳斥鹵之所淫濫與夫疏篁茂木頽垣
廢丘皆得於轉瞬之頃於是恂然忽疑從樊籠中
出也絕頂之北有石若地而中留踐之令人善畏
而得脣則定心石也山後有石卯港觀音洞朝天
巖去思亭皆利下觀而醒石尤以名若石廣厚畧
亭可坐十輩其上醒石之西有紫石巖石紫赤色
相錯雜而紫為多以游至者悉攬名其上今亦頗
可別詠劍脊馬鞍二山游者罕至獨峭壁隆隆發

數十仞疑造物者於此喜為鑿刻以驚世也軍山
宜山茶花號多歲薇仙女山最外峙有穴通中頂
巖壑有自龍舒來者年七十餘獨食息其中似得
道者山有拇迹鞭痕皆著石或云秦始皇履是山
且鞭以投海中俗之好怪乃如此而僧語余曰今
之山踞雖皆平陸然前五十載海也其深蓋碗絲
千尋莫能測而自軍山左轉皆闕艘吳艦與渡而
漁且漕者之所出入山前後石齧若鐘釜然者皆
水所湍激而巖有鏡天祚者五代姚存鱗舟時題
識也余聞而異焉且淮海方數千里自江都走海
陵絕吳會其間以佳山川著稱無幾矣至是而僅
得五山焉則又皆盤礴吐吞於窮海僻陋之濱若
避而肥與畏名而逃焉者獨何耶然五山當潮波
撼一方如唇齒傳脰咽便通民恃以不怵而間則
蒸油雲泄膏雨以利生物其作鎮此土殆天意非
可私智測也余也服吏役一投足而五山之美盡

得於人跡之所不到竊自比於醜雞
別舞甕外之一天則亦不得而默矣

劍迹山在狼山東一名刀刃山世謂秦始皇淬劍
於此有磨劍石今墜於江東南有雙人峰其下有

燕子洞

軍山一名象山在劍迹山東南隔江數里一統志
云越王嘗軍於此新志云秦始皇二十二年巡行
至此屯軍中有卧雲窟山茶灣諸勝其東北麓有
椒嘴石長數十丈以潮長落為出沒相傳月明時

聞笙簫之聲

附

明嚴爾珪五山拱北碑銘

登五岳而小

下登五山而小崇川五山其通之五岳乎大江流
憑自恣五岬盤峙如列掌余每過之幾片青芙蓉
奇秀萬狀白鵝居然長之若劍迹若黃泥若馬鞍
皆其伯仲而麟次者矣軍山在水中中央宛一旁伍
波臣湖泮走五山之趾狂欲吞山山堅壁當之如
諸葛壘如岳家軍森布崎嶇扼之而不動通以此
論岷江流差地夜郎自雄稱小五岳也州人士所
疑者謂山陽盤旋南向其陰多境崑絕壁怪石聳
牙夫其情不屬我乎余解之曰非然哉茲山為江
而設奇為通而岸江者也故悉其峭雄勃牽之力
南走絕江而故張其凌迤整暇之勢分合奇正與
江水相持要其所擁護而落屏神情未嘗不北拱
也譬猛將軍捍禦邊陲逢勁敵旗鼓軍容無不向
敵者然則內地安瀾數峰容與山之輕裘而緩帶

者也而茲山獨處其勞疊嶂層巒跨江臨海山之
居重而擁強者也而茲山孤奮其勇山之拱通也
亦至矣州人士猶重疑之乎余將酬山靈加勞焉
因題之曰五山拱北即山靈快然當以余言為已
知也爰進銘之曰維通有山歸兮森峙固我邦圍
峙離厥祉江濤怒攻介人在此忠而被謗僉謂南
指珪來眺臨雪其非是五靈競呼
曰惟所使為通篤祐有加於始

塔山在狼山西俗名黃泥山舊傳有女子得道於
此下有仙女洞其西下有石刻通濟廟字蓋元時
海運故道也

馬鞍山在塔山西一統志謂以形似名舊志云隋

煬帝征高麗曾放馬於此

東土山在州東十五里築土所成樹蔭水繞亦為勝遊之地

東山在州海門鄉呂四場相傳宋淳熙中孫道人所築以術運米建廟於山

會聖山在州海門鄉東三十里運河之北

摩訶山在如皋縣南百二十里大江中水勢湍激俗名蝦蟆山初山在縣南界今江漲山遠去岸逾

五十里矣

碧霞山在如皋縣西北上有碧霞元君祠又縣有三土山一在安定鄉一在豐利場一在馬塘與此皆築土所成

孤山在泰興縣東南七十里石壁臨江上多大竹縣之鎮山也今沙漲江遠山與靖江連界矣

高阜在如皋縣北五十里東西亘五十里相傳古海岸也

平阜在如皋縣南江寧鄉東西亘六十里相傳古
江岸也上多竹樹亦宜五穀

大海在州東北北連泰州東盡海門諸鹽場循岸
而棋布焉

大江在州南二十里西自江都入泰興縣界過如
皋抵於州治東至料角嘴入海南與太倉州海口
相望

西亭河在州東北二十里西亭場

運鹽河在州西北自秦州東行百六十里至海安
鎮入如皋界又東南行百一十里至白蒲入州界
又東行百五十里過海門鄉達於呂四場

金沙河在州東三十里金沙場與西亭河俱宋兩
淮制置使李庭芝鑿

石港河在州西北七十里石港場又為新河新河
東為仇家河以上諸河皆與海通浸灌甚廣自明
隆慶中於海濱鑿串場河而諸河皆謂之故河云

山河自州治南直達狼山舊志云海運故道由此
以入漕河

葛堰河在如皋縣東南二十里東通十竈西接運
鹽河

龍遊河在如皋縣東南六十里亦名九十九灣河
舊傳龍過而成河其形環曲北接運河南通大江
故又名通江河

立發河在如皋縣北三十里北接運鹽河東至於

海

汭河在如皋縣東北豐利場南通運鹽河北至於

海

姜溪河在泰興縣東南直達靖江界河

新河在泰興縣西南三十里通大江

得勝河在泰興縣西南四十五里通江即盛大港

芹湖在如皋縣西安定鄉北達溪河西通泰興今

已湮塞

祥符湖在如皋縣東南六十里亦名高陽蕩西接運鹽河東達於海

瀛溪在如皋縣北安定鄉水繞洲如瀛洲然故名西通泰興縣東接黃蒲溪

蟠溪在如皋縣北亦古邗溝也以洲渚灣環而名西接運鹽河東入於海

瞿窰港在州東金沙場又有唐窰港又西亭場餘西場諸港皆與海通

進鮮港在州之海門鄉諸港皆通江海今多湮沒
石莊港即天生港在如皋縣南六十里宋吳濛詩
烟含樹色連沙嶼風帶潮聲怒石砭

暇思港在如皋縣西南七十里

國朝康熙六年開濬

掘港在如皋縣東百三十里西通運鹽河東抵海
其地為廣陵東南門戶

石砭港在泰興縣東南又有蔡家廟樹柏家三港

俱於康熙六年開濬

王家港在泰興縣西南三十里舊志云與孟瀆河相對商賈舟舶之所必由其北有洋思港亦通於

江

廟港在泰興縣西三十里流經江都縣境入江又西十五里有過船港又縣東南有印莊港西南有小麥港皆通大江

白水蕩在州東百二十里呂四場其地廣闊魚鳥


鹿鶴所萃

鄭公灘在如皋縣東北百二十里豐利場宋治平間富鄭公弼判揚州鑿以習水戰

相見灣在泰興縣東北俗謂之龍開河河形委曲舟行雖有先後至灣則帆檣相見可呼而應因名又馬橋河在縣南與龍開河接

度軍井在如皋縣西十里一名聖井不甚深汲將盡擊其欄則溢出宋岳飛經畧通泰駐兵於此資

給無價



江南通志卷十四